



Jerebu: Rompin, Bandar Raya Melaka tidak sihat

KUALA LUMPUR: Hanya dua kawasan iaitu Rompin di Pahang dan Bandar Raya Melaka mencatatkan bacaan Indeks Pencemaran Udara (IPU), tidak sihat.

Data Indeks Pencemaran Udara Malaysia (APIMS), dikeluarkan oleh Jabatan Alam Sekitar (JAS) menunjukkan bacaan IPU di Rompin mengalami penurunan sedikit, iaitu daripada paras 138 (6 petang) kepada tahap 132 kira-kira jam 12 tengah malam tadi.

Begitu juga dengan bacaan IPU di Batu Pahat, Johor, yang mencatatkan bacaan kurang sihat, 104 (6 petang) menurun kepada paras sederhana, 94, pada jam 12 tengah malam tadi.

Bagaimanapun, keadaan sebaliknya berlaku di Bandar Raya Melaka apabila bacaan IPU menunjukkan peningkatan daripada paras sederhana, 92 (jam 6 petang) kepada tahap kurang sihat, 107, pada jam 12 tengah malam tadi.

Data APIMS juga menunjukkan sebanyak 47 kawasan kini berada dalam tahap sederhana, manakala keadaan udara 19 lagi daerah berada di paras baik.

Bacaan Indeks Pencemaran Udara (IPU) 0-50 menunjukkan kualiti udara sihat; 51-100 (sederhana), 101-200 (tidak sihat), 201-300 (sangat tidak sihat) dan melebihi 300, berbahaya.

Orang awam boleh merujuk laman web Jabatan Alam Sekitar (JAS) di alamat <http://apims.doe.gov.my/v2/> atau dengan memuat turun aplikasi telefon pintar, MyIPU di 'Google Play' bagi mendapatkan bacaan IPU terkini pada setiap jam.